



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400; 726 412
fax. +387 33 726 423
e-mail: info@voda.ba

Broj: **UP-1/21-3-40-387-4/23**
Datum: **11.01.2024. godine**

«Agencija za vodno područje rijeke Save» rješavajući po zahtjevu podnesenom od strane JP Autoceste Federacije BiH d.o.o. Mostar za izdavanje vodne dozvole za dio izmještene magistralne ceste M-17 u sklopu autoceste na koridoru Vc, dionica Nemila - Vranduk, na osnovu člana 109. stav 1. tačke 2. i 9. Zakona o vodama («Službene novine Federacije BiH», broj 70/06), te člana 200. stav (1) i 213. Zakona o upravnom postupku («Službene novine Federacije BiH», broj 2/98, 48/99 i 61/22), **donosi**

RJEŠENJE **o vodnoj dozvoli**

1. Podnosiocu zahtjeva, JP Autoceste Federacije BiH d.o.o. Mostar, daje se djelimično rješenje o vodnoj dozvoli za dio izmještene magistralne ceste M-17, od profila P104 do profila P178, dužine 1850m, koja predstavlja funkcionalnu cjelinu na poddionici autoceste na koridoru Vc, Nemila - Vranduk.
2. Ova vodna dozvola se odnosi na aktivnost prikupljanja i odvodnje oborinskih voda sa kolovoza magistralne ceste i ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
3. Vodna dozvola se daje na osnovu izvršenog uviđaja obavljenog na predmetnoj dionici i činjenica utvrđenih pregledom raspoložive projektne i ostale dokumentacije priložene uz zahtjev.
Ova vodna dozvola se izdaje pod sljedećim uslovima:
 - 3.1. Objekte čija je svrha prikupljanje i odvođenje oborinskih voda sa predmetne saobraćajnice te njihovo ispuštanje u recipijent, koji uključuju slivnike, rešetke, rigole, reviziona okna, spojne kanalizacione vodove, obodne kanale i propuste treba redovno održavati i koristiti na način koji će obezbijediti njihovu potpunu ispravnost i funkcionalnost.
 - 3.2. U slučaju vanrednih situacija, havarijskih (incidentnih) onečišćenja i drugih sličnih okolnosti koje bi nastupile kao posljedica prirodne katastrofe ili ljudskog faktora, a što bi moglo prouzročiti zagađenja površinskih i podzemnih voda, korisnik objekta je dužan izvijestiti nadležne organe i postupati po nalogu mjerodavnih institucija, te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
 - 3.3. Stručne službe JP Autoceste Federacije BiH d.o.o. Mostar u čijoj nadležnosti je održavanje saobraćajnice, dužne su organizirati periodični obilazak i utvrđivanje stanja na objektima za odvodnju, propustima na mjestima ukrštanja sa stalnim i povremenim vodotocima i iste održavati u funkcionalnom stanju.
4. U periodu važenja ove dozvole pravno lice JP Autoceste Federacije BiH d.o.o. Mostar je dužno provoditi sve mjere i aktivnosti propisane ovom dozvolom.
5. Ukoliko dođe do promjene ili poremećaja režima voda kao posljedica izgradnje predmetne magistralne ceste i to prouzrokuje štete ma kakvog karaktera, korisnik je dužan uzroke nastalih šteta otkloniti, a nastale štete trećim licima nadoknaditi.
6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
8. Ova vodna dozvola, shodno članu 117. stav (1) Zakona o vodama se daje sa rokom važenja od 2 (dvije) godine, od dana pravosnažnosti ovog rješenja.
9. Ova vodna dozvola može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

JP Autoceste Federacije BiH d.o.o. Mostar, se zahtjevom broj: 05-7882/23, zaprimljenim 08.09.2023. godine, obratilo ovoj Agenciji za donošenje rješenja o vodnoj dozvoli za dio izmještene magistralne ceste M-17, od profila P104 do profila P178, dužine 1850m, koja predstavlja funkcionalnu cjelinu u sklopu izgradnje poddionice autoceste na koridoru Vc, Nemila - Vranduk.

U provedenom postupku, uz zahtjev za donošenje rješenja o vodnoj dozvoli, dostavljena je i pregledana slijedeća dokumentacija:

A. Opšta dokumentacija

- Ovjerena kopija rješenja o izmjenama podataka u sudskom registru broj Tt-O-463/2023 od 09.06.2023. godine;
- Ovjerena kopija Potvrde o promjenama podataka za porezni identifikacijski broj, Kantonalni porezni ured Mostar, od 27.06.2022. godine;
- Dokaz o uplaćenju upravnoj taksi u iznosu od 70,00 KM;
- Kopija rješenja o vodnoj saglasnosti broj UP-I/25-2-40-202-6/20 od 07.08.2020. godine izdato od strane Agencije za vodno područje rijeke Save Sarajevo;
- Kopija rješenja o odobrenju za građenje broj: UPI/03-19-2-172/21 od 14.09.2021. godine, izdato od strane Federalnog ministarstva prostornog uređenja;
- Kopija Zbirnog izvješća komisije za tehnički pregled, dostavljeno 11.01.2024. godine;

B. Tehnička dokumentacija:

- Glavni projekat, Knjiga D 1010: „Građevinski projekt vanjske odvodnje – tekstualni dio“, juli 2017. godine, urađen od strane „Integra d.o.o. Mostar“;
- Glavni projekat, Knjiga D 1011: „Građevinski projekt vanjske odvodnje – nacrti“, juli 2017. godine, urađen od strane „Integra d.o.o. Mostar“;
- Glavni projekat, Knjiga D 1100: „Građevinski projekt unutarnje odvodnje – tekstualni dio“, juli 2017. godine, urađen od strane „Integra d.o.o. Mostar“;
- Glavni projekat, Knjiga D 1101: „Građevinski projekt unutarnje odvodnje – nacrti“, juli 2017. godine, urađen od strane „Integra d.o.o. Mostar“;
- Glavni projekat, Knjiga D 1200: „Građevinski projekt regulacije Nemilske rijeke“, juli 2017. godine, urađen od strane „Integra d.o.o. Mostar“.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. Stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19, 41/20 i 63/22), izvršen je obilazak predmetne dionice autoceste i tom prilikom sačinjen zapisnik o uviđaju broj: UP-1/21-3-40-387-2/23 od 09.10.2023. godine.

Na osnovu pregleda raspoložive dokumentacije i izvršenog uviđaja na predmetnoj lokaciji utvrđeno je slijedeće:

Predmet ovog uviđaja je novoizgrađena (izmještена) magistralna cesta M-17, u dužini cca 1850m, koja predstavlja funkcionalnu cjelinu na poddionici Nemila – Vranduk. Nakon izvršenog uviđaja na terenu, utvrđeno je da su okončani svi radovi na odvodnji predmetne dionice saobraćajnice u skladu sa projektnom dokumentacijom.

Razlozi za parcijalno puštanje u funkciju predmetne dionice magistralne ceste M17 je omogućavanje realizacije dionice auto ceste čiju je izgradnju moguće realizirati jedino ukoliko se omogući izmještanje dijela M17 ceste jer se trasa postojeće M17 poklapa sa trasom auto ceste..

Odvodnja površinskih voda na magistralnoj cesti podijeljena je na sistem unutrašnje i vanjske odvodnje. Sistem odvodnje izmještene magistralne ceste M17 je izveden neovisno od sistema odvodnje autoceste i to kao otvoreni sistem odvodnje otvorene trase. Na predmetnoj dionici izmještene magistralne ceste nije predviđen tretman prikupljenih oborinskih voda.

Sistem unutrašnje odvodnje voda sa kolovoza magistralne ceste, zavisno od poprečnog nagiba ceste, izveden je kao disperzno odvodnjavanje preko bankine i kosine nasipa u slučaju nagiba ka rijeci Bosni te kao otvoreni sistem odvodnje (rigol-propust), u slučaju nagiba ka kolovozu autoceste.

Vanjska odvodnja izmještene magistralne ceste riješena je u sklopu vanjske odvodnje autoceste na predmetnoj dionici, sa zajedničkim propustima kroz trup saobraćajnice kojim se kontrolisano odvode vode ka recipijentu - rijeka Bosna. Ispusti u koritu rijeke Bosne su završno obrađeni u skladu sa projektnom dokumentacijom.

Na predmetnoj dionici izmještene magistralne ceste izvedeni su montažni cjevasti propusti u skladu sa projektnom dokumentacijom.

Na predmetnoj dionici je izvedena i regulacija Nemilske rijeke u zoni kolizije sa trupom saobraćajnice na način da je formiran sandučasti AB profil a van trupa AB konstrukcija „U“ oblika.

Na osnovu provedenog postupka, a u cilju smanjenja zagađenja voda, postizanja dobrog stanja voda, sprječavanja degradacije voda, umanjivanja mogućnosti štetnog djelovanja voda kao i održivog korištenja voda, podnosiocu zahtjeva, JP Autoceste Federacije BiH d.o.o. Mostar, ovom vodnom dozvolom su u tački 3. dispozitiva rješenja propisani uslovi korištenja i održavanja objekata koji utiču na režim voda te načina provođenja aktivnosti ispuštanja oborinskih voda.

Na osnovu provedenog postupka konstatuje se da je podnosilac JP Autoceste Federacije BiH d.o.o. Mostar ispunio minimum uslova za izdavanje vodne dozvole za dio izmještene magistralne ceste M-17 koja predstavlja funkcionalnu cjelinu, kako je to regulisano članom 115, do člana 118. Zakona o vodama i članom 12. i 13. Pravilnika o sadržaju, obliku, uvjetima, načinu izdavanja i čuvanja vodnih akata, te je riješeno kao u dispozitivu ovog rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi („Službene novine Federacije BiH“, broj 06/98, 8/00, 45/10 i 43/13).


UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih upravnih taksi.

Voditelj postupka:

Nihad Pezo, dipl.inž.grad.

Po ovlaštenju
Rukovodilac sektora za izdavanje
vodnih akata



Haris Ališehović
Haris Ališehović, dipl.inž.grad.

Dostaviti:

- JP Autoceste Federacije BiH, Adema Buča 20, Mostar (Prilog – tehnička dokumentacija navedena pod tačkom B obrazloženja Rješenja)
- ⊙ AVP Sava, ISV – Vodna knjiga
- Sektor 40, arhiva
- oglasna ploča AVP – Sava